

Kudiks n Halab
Ukkis n wedlis wiss tnayen n Ttawrat
920 a.Lm. (=awarni i Lmesih)



asemyar n tira n Yacuea 1:1

Kudiks d ijj n wedlis i itwaggen zi tefrawin n uyanim qqaren as 'papiirus'. Kudiks n Halab days azyen ameqqran n marra wawafen n idlisen iqeddsen n Wudayen inni umi qqaren Tanax niy Reahd Aqdim (RA). Itwari Kudiks n Halab di tasutin timerwuşa (=Iqurun lwusta), di tasut n 10 awarni i Lmesih (a.Lm.) uca itwahsab zeg idlisen i yar iğa wemcan d ameqqran qac di tira n "Masura" (=abrid i x twaggen marra irisfusen n idlisen iqeddsen n Wudayen ak-d marra tineqqidin sennej d swadday i feh'ruf) i zi itwassmutti wawaf n Arebbi zi jjiif yar weneyni. Tiyuriwin tineggura i xas ggin ufint aqa days imenzayen n "Masura" twaweqqaren aṭṭas qac u days myir drus n tmesrayin i war iğin ca nican zi 2,7 melyun n feh'ruf i immarsen deg wedlis. S uya zezzaren imesnawen yar Kudiks n Halab belli aqa yars amcan d ameqqran qac jar marra idlisen iqeddsen itwahdan s webrid n 'masura' (zi jjihet n feh'ruf, tineqqidin d wawafen), waxxa aṭṭas n tira n mexas n idlisen n Ttawrat d izeynaten nneyni weddaren.

Ipapirusen n 'Chester Beatty'
175-225 awarni i Lmesih



Aqa din iğa 5686 n irisfusen (=řmaxtuṭat) s yiřes n Tyunanect n L'injil niy Reahd n Jdid (řJ) u jarasen ijj n ukkis n L'injil s ufus n Yuḥanna itwari eřaḥař 30-50 n iseggwusa awarni mma itwari L'injil s ufus n Yuḥanna simant nnes d tarisfust nni qqaren as 'John Rylands Papyri' zeg useggwas 125 awarni i Lmesih.

Sennej ict n tfarct n Upapirus 46 zeg useggwusa 175-225 awarni i Lmesih wenni days awafen n Tebrat n umazan Bulus yar Kurintus (2 Kur. 11:33-12:9). Tfarct-a d ijj zeg ipapirusen n 'Chester Beatty II' nni twahdan di Dublin ufa di Ljamia n Mitgican. Ipapirusen nni daysen azyen ameqqran n tibratin n Bulus.

Kudiks n Aliksandriya
Ukkis n L'injil s ufus n Luka



Tafarct 65 zi Kudiks n Aliksandriya days awafen ineggura n L'injil s ufus n Luka ak-d uzewwaaq i itwafen yar uneggarr n kuř adlis.

Kudiks n Aliksandriya (London, British Library, MS Royal 1. D. V-VIII; Gregory-Aland no. A or 02, Soden ̅4) d ijj n urisfus (=řmaxtuṭ) i yeqqnen yar tasut wiss 5 zeg Wedlis Iqeddsen - Reahd Aqdim (RA) ufa d Reahd n Jdid (RJ) - s tnayen s Tyunanect. Awafen n Reahd Aqdim i days twaksin zi 'Siptuwaxinta', atarjem n idlisen iqeddsen n Wudayen yar tyunanect eřaḥař 200 iseggwusa qbeř Lmesih. Arisfus-a d ijj zi arebca n ikudiksen imeqqranen uca itwahsab Kudiks n Aliksandriya ak-d Kudiks n Sinayi d Kudiks Vatanusan jar irisfusen iqdimen d ikemmřen qac n Wedlis Iqeddsen. Isem nnes yusa-d zi Aliksandriya. Ida, aqa-t x uyezdis n Kudiks Sinayi deg wexxam n 'Ritblat Gallery' di Lmektaba n Britanya di London.

Apapirus n 'Bodmer II' (P66)
200 awarni i Lmesih



Ipapirusen n 'Bodmer' twafen deg useggwas 1952 di Pabaw yar Dicna di Miřra, deg ijj n wemcan war iggwij ca x Nag Hammadi. Irfisusen twassmunen di tnuffra s ufus n ijj n weryaz n Kuprus qqaren as Fukiyu Tanu. Xenni yiwi ten yar Swisra mani isya iten Martin Bodmer (1899-1971). Ipapirusen n Bodmer twassuffyen deg useggwas 1954. Ipapirusen n Bodmer twahdan řexxu d Lmektaba Bodmiriana di Kulunji, ict n tendint tudes Jinawi di Swisra. Jarasen itwaf Upapirus 66 (P66) days ijj n wezyen n wawafen n L'injil s ufus n Yuḥanna zeg useggwas 200 awarni i Lmesih nni itwahseb jar idlisen i dd-ittasen ak-d webrid (niy 'uslub') n Aliksandriya.